

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

लेफ्टिनेंट गवर्नर मनोज सिन्हा होरें आखेआ ऐ जे पाकिस्तान गी सख्त चेतावनी देई दित्ती गई ऐ जे जेगर भविक्ख च ओह कुसै किस्मै दी नापाक हरकत करोग तां साढ़े थेहारबंद बल उसी पक्क गै तबाह करी देडन।

केन्द्री मंत्री डाक्टर जीतेन्द्र सिंह होरें मिल्टरी अस्पताल सतवारी दा दौरा लाइयै उत्थे जेरे इलाज जवानें कन्नै मलाटी कीती ते उ'दी दलेरी ते मजबूत जज्बे दी सराहना कीती।

प्रमुख सेना अध्यक्ष जनरल अनिल चौहान होरें उधमपुर च फौज दी उत्तरी कमान दा दौरा लाइयै आपरेशन सिंदूर दरान कीती गेदी कार्रवाईएं दा जायजा लैता ते जम्मू-कश्मीर च आतंकवाद-रोधी जतनें दी सराहना कीती।

जम्मू रेलवे डिवीजन आसेआ पैहली चैरी-कारगो कोच आहली ट्रेन औंदी 3 जून गी कटरा थमां मुंबई लेई रवाना कीती जाहग।

खेलो इंडिया बीच गेम्स च जम्मू-कश्मीर नै शानदार प्रदर्शन करदे होई 9 तगमे हासल कीते न। खेड्ड मंत्री मनसुख मांडविया होरें जम्मू-कश्मीर दी इस उपलब्धि लेई सराहना कीती ऐ।

<><><><><><>

LG Jat Sabha

लेफ्टिनेंट गवर्नर मनोज सिन्हा होरें आखेआ ऐ जे पाकिस्तान गी पैहले गै सख्त चेतावनी देई दित्ती गई ऐ कि जेगर भविक्ख च ओह कुसै किस्मै दी कोई नापाक हरकत करोग तां साढ़े थेहारबंद बल इस आतंकवादी मुख्य गी पक्क गै तबाह करी देडन। भारत दे थेहारबंद बलें दी दलेरी पर लोऽ पांदे होई एलजी होरें जम्मू-कश्मीर गी पूरी चाल्ली आतंकवाद शा मुक्त बनाने दे सरकार दे धेइये गी फही पक्का कीता। एह गल्ल उ'नें जम्मू च कल जेएंडके जाट सभा आस्सेआ आयोजित इक कार्यक्रमे गी संबोधित करदे होई आखी।

श्री सिन्हा होरें जाट समुदाय ते समाज दे सब्भनं तबकें गी अपील कीती जे ओह बंड्ड पुआने आहले ताकतें ते रमानदारी ते समाजी ताने—बाने गी नुक्सान पुजाने आहले तत्वे खलाफ लड़ाई च इक्कजुट होई जान। इस मौके पर एलजी सिन्हा होरें आखेआ

<><><><><><>

MoS Satwari Visit

केन्द्री मंत्री डाक्टर जीतेन्द्र सिंह होरें कल जम्मू दे सतवारी आहले मिल्टरी अस्पताल दा दौरा लाइयै उत्थे हाल दे समें दरान अंतर्राष्ट्री बन्ने ते कब्जा रेखा पर पाकिस्तान कन्नै बनी दी तनोतनी ते फौजी कार्रवाईएं दरान जख्मीं होए दे जवानें कन्नै मलाटी कीती। डाक्टर सिंह होरें फौजी जवानें दी दलेरी ते मजबूत जज्बे दी सराहना करदे होई आखेआ जे समूलचा राष्ट्र सदा उं'दा कर्जदार रौहग। डाक्टर सिंह होरें जवानें गी बेल्ले सिर ते बधिया इलाज उपलब्ध करोआने लेई ब्रिगेडियर डाक्टर फैयाज अहमद हुंदी अगुवाई आहली मेडिकल टीम दी बी बड़ी मती सराहना कीती। इस मौके पर बोलदे होई डाक्टर जीतेन्द्र सिंह होरें आखेआ

<><><><><><>

CDS Udhampur Visit

सेना प्रमुख जनरल अनिल चौहान होरें कल उधमपुर च भारतीय सेना दी उत्तरी कमान दा दौरा कीता, जित्थें उनेंगी आतंकवादी तंत्र गी बेअसर करने ते बसनीकें ते फौजी संनत्तिएं दी हिफाजत च आपरेशन सिंदूर दी कामयाबी दे बारे च जानकारी थोई। उनें बन्ने कोल रौहने आले लोकें आस्तै पुनर्वास दी कोशशें दी बी समीक्षा कीती। उत्तरी कमान दे सेना कमांडर होरें लगातार संचालन ते साजो समेयान दी तैआरिएं दे बारे च जानकारी दिक्ती। इस मौके पर सेना प्रमुख अनिल चौहान होरुं चुनौतीपूर्ण माहौल च पूरे तालमेल कन्नै कम्में गी तौले सबूरा करने दी सराहना कीती। उनें हरियाणा दे चंडी मंदर सेना स्टेशन च स्थित पश्चिमी कमान दा बी दौरा कीता।

<><><><><><>

Tiranga Rally

आपरेशन सिंदूर दी कामयाबी दा जश्न मनाने दे मकसद कन्नै कल जम्मू दे बठिंडी इलाके च इक बड्डी तिरंगा रैली दा आयोजन कीता गेआ। हर उम्री ते तबकें दे लोकें थेहारबंद बलें दे समर्थन च पूरे जोश कन्नै इस तिरंगा रैली च हिस्सा लैता।

इ'नें लोकें हत्थें च तिरंगे झंडे फगड़ियै देशभक्ति दे नारे बी लाए। तिरंगा रैली च हिस्सा लैने आहले किश लोकें आकाशवाणी समाचार कन्नै गल्ल करदे होई अपने बचार सांझे कीते।

तोआई इस्सै चाल्ली दी तिरंगा रैली दा आयोजन किशतवाड़ दे द्रबशाला ते कुंतवारा इलाकें च बी कीता गेआ। एहदा मकसद आपरेशन सिंदूर दी कामयाबी दा जश्न मनाना ते अपने थेहारबलें बलें दे प्रति समर्थन ते इक्कजुटता दर्शाना हा। विधायक शगुन परिहार बी इस तिरंगा जात्तरा च शामिल होइयां।

<><><><><><>

Cheery Cargo Train

इक तय समें अवधि अंदर खराब होई सकने आहले चैरी ज्नेय उत्पादें गी जम्मू-कश्मीर थमां बाहर स्टेई ते सुरक्षित पुजाने दी अपनी किस्मै दी इक अनोखी पैहलकदमी दे तैहत जम्मू रेलवे डिवीजन आसेआ औंदी 3 जून गी कटरा रेलवे स्टेशन थमां मुंबई दे बांदरा स्टेशन लेई पैहला पार्सल कोच रवाना कीता जाहग। मैहकमा बागवानी ते फल उत्पादकें दे सलाह-मशवरे कन्नै कीती जा'रदी इस पैहलकदमी दा मकसद इस गल्लै गी जकीनी बनाना ऐ जे ताजा फल ते उत्पाद बिजन कुसै नुकसान दे देसै दे होरनें बजारें तोहड़ी पुज्जी सकन। इस कारगो गी मालगड्डी दे कन्नै जोड़ियै रवाना कीता जाहग ते एह 30एं घैंटें दा सफर करियै मुंबई पुज्जोग। जम्मू रेलवे डिवीजन दे वरिष्ठ डिवीजन बवसायिक प्रबंधक उचित सिंघल होरें आखेआ ऐ जे एह पैहलकदमी, रेलवे, फल उत्पादें ते जम्मू-कश्मीर दी अर्थबवस्था इ'नें सब्भनें लेई बड़ी कारी दी साबत होग।

<><><><><><>

Khelo India Beach Games

जम्मू-कश्मीर नै समुंदरी कंडे आहली खेड्डें 'खेलो इंडिया बीच गेम्स' च सुन्ने दे 5 तगमे, चांदी दा 1 तगमा ते कैह दे 3 तगमें सने कुल 9 तगमे जित्तियै 30एं राज्यें ते केन्द्र शासित प्रदेशें च चौथी थाहर हासल कीती ऐ। साढ़ा प्रदेश, मर्दे दे पेनचॉक सिलाट श्रेणी च पैहली थाहर ते महिलाएं दी श्रेणी च त्रीये नम्बरै पर रेया ऐ। केन्द्री खेड्ड मंत्री डाक्टर मनसुख मांडविया होरें जम्मू-कश्मीर दे खड्डारिएं गी उ'दी खेड्ड उत्कृष्टता दे प्रति बेजोड़ निष्ठा ते वचनबद्धता लेई सराहना कीती ऐ आखेआ ऐ जे राष्ट्री स्तर दे इस खेड्ड मुकाबले च जम्मू-कश्मीर दी कामयाबी, होरनें आस्तै मिसाल बनोग।

<><><><><><>

Satish Sports

खेड्ड मंत्री समीश शर्मा होरें आखेआ ऐ जे मुखमंत्री उमर अब्दुल्ला हुंदी अगुवाई च औने आले दिनें च खेड्ड खेत्तर च महत्वपूर्ण तब्दीलियां दिक्खियां जांगन। उनें खेड्डें दे राएं नोजवानें दे जुड़ाह गी बढ़ावा देने दी सरकार दी वचनबद्धता गी उजागर कीता। मंत्री होरें टीम रेड आस्सेआ आयोजत इक कार्यक्रम दे दरान एह गल्ल कीती। कार्यक्रम दा मकसद नोजवानें च नशीले पद्धार्थ दु दुरुप्योग दे खतरें दे बारे च जागरूकता बधाना हा। इस कार्यक्रम च जोश ते उत्साह आली हिस्सेदारी दिक्खी गई। एह पैहल खेड्डें जनेही सकारात्मकगतिविधिएं दे राएं युवा पीढ़ी आस्तै सेहतमंद ते नशे शा मुक्त भविष्य दे सनेए गी मजबूत करदी ऐ। इस मौके पर बोलदे होई मंत्री समीश शर्मा होरें आखेआ.....

<><><><><><>

Reasi Blossoms

रियासी जिले च सब्सिडी आहली बक्ख-बक्ख योजनाएं दे राहें फुल्लें दी काश्त सरबन्धी गतिविधिएं गी बढ़ावा देने दी सरकार दी पैहलकदमी दे बड़े शानदार नतीजे दिक्खने गी लब्धा करदे न ते इन्नें जतनें दी बदौलत मुकामी करसानें दे जीवन च सकारात्मक बदलाव आवा'रदे न। सरकार आसेआ चलाए जा'रदे फुल्लें दी काश्त सरबन्धी सब्सिडी आहले प्रोग्राम दा लाह ठोआइयै रियासी जिले दे केई करसान सलाना 3 शा 4 लक्ख रुपें तगर दी कमाई करा करदे न। नेह गै इक करसान न शैल सिंह जि'दी कामयाबी दी कहानी होरनें आस्तै प्रेरणा दा जरिया बना करदी ऐ। इस सरबन्धै च आकाशवाणी समाचार कन्नै गल्ल करदे होई शैल सिंह होरें आखेआ

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबन्धत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ।

दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>